

朝廷臣等未敢擅擬伏乞

聖裁等因題奉

聖旨陶琰准照例與祭葬還與他謚欽此欽遵合就照會本布政司
照依本部題奉

欽依內事理欽遵施行仍將用過官錢開報戶部知數毋得因而科
擾不便湏至照會者 計開

聞喪

七七

下葬每次

諭祭一壇

一祭文

維嘉靖十二年歲次癸巳三月甲辰朔越十八日辛酉

皇帝遣山西等處承宣布政使司左叅政車純

諭祭于光祿大夫太子太保南京兵部尚書贈少保謚恭介陶琰

曰卿操持清介才識宏深擢秀甲科馳聲郎署藩臬若歷都憲超

登中忤權奸暫躓復起總司漕運巡視江淮敷歷既久譽望益隆

懇乞優閒進止以禮屬予初政起自立園晉位地卿載迂司馬風

節益勵終始弗渝出入勤勞餘五十載方隆倚毗懇疏歸休宜膺

壽趾光我邦家老成云亡良切傷悼竇階加贈稽行易名祭葬特

頒庸彰異數卿靈如在尚克歆承

一品物

猪一口 羊一腔 饅頭五分 粉湯五分

果子五色 每色一斤 按酒五盤 鳳雞一隻

煤骨一塊 煤魚一尾 酥餅四箇 酥餃四箇

魚湯一分 雞湯一分 降其香二炷 燭一對重斤

焚祝紙一百張 酒二瓶

下葬文

維嘉靖十二年歲次癸巳十二月乙丑朔越四日辛巳

皇帝遣山西等處承宣布政使司左叅政車純

諭祭于致仕太子太保南京兵部尚書贈少保謚恭介陶琰

曰卿高年碩德歷事

累朝中外勤勞險夷一致懇求休退善保令終奄及葬期益增悼惜

再頒諭祭用篤眷懷靈其有知尚其歆慰

七七文同但遇某七改葬期為某七

品物俱同

右照會山西等處承宣布政使司准此

嘉靖十一年十二月二十四日

照會

押 押

平陽府為比例陳情懇乞

天恩優卹贈謚葬祭以勵臣節以光泉壤事承奉山西等處承宣布

政使司劄付蒙

欽差提督鴈門等關兼巡撫山西地方都察院右僉都御史陳 批

該本司呈工房准勘合科承准工部管字勘合該本部題屯日清

吏司案呈奉本部送在禮部咨吏科抄出右軍都督府都事陶

奏云云等因題奉

聖旨陶琰准照例與祭葬還與他謚欽此等因咨部送司查得先該

工科題審時省禮以寬民力事該本部議擬病故大臣照依今定

後開價值轉行有司措辦給付喪家自行造葬不必差官中間果

有功德昭彰聞望素著公私無過或曾歷邊務建立奇功及經募

修効勞年久此等官員差官造葬俱聽本部臨時斟酌奏

請定奪等因題奉

武宗皇帝聖旨是造墳開塋工料價銀則例都准擬行欽此已經通

行欽遵去後今該前因案呈到部看得太子太保南京兵部尚書

陶病故係在京文職一品官員造墳工料合給全價况本官宦歷

四朝年逾八表清修苦節克全始終偉績豐功懋著中外譽望久騰於朝野行藏無愧於天人相應差官造墳以示優異查得本部屯田司辦事進士嚴寬堪以差委合無本部照例給批計算水程限期行移兵部應付前去山西布政司比号相同着該當該官吏照依原定價銀夫匠數日派辦本布政司仍委官一員管領前去造墳處所聽候本部委官督理用工作式造葬畢仍將用過價銀夫匠物料數目通行布政司類造黃冊一本送部查考緣係差官造葬及奉

聖旨陶琰准照例與祭葬還與他謚事理未敢擅便等因題奉

聖旨是欽此欽遵類行本司移付本房施行計開已故太子太保兵部尚書陶係在京一品文臣造墳工料合給全價該銀三百兩夫匠二百名每名出銀一兩等因備付准此行問擬本司經歷司抄蒙本部委官進士嚴案驗亦為前事仰司抄案呈堂照依案驗備奉劄付及題奉

欽依內事理照依後開原定價銀夫匠數目派辦及委廉幹佐貳官一員親詣造墳處所督理用工作式造葬仍候本職提調查考畢日仍將又用過價銀夫匠數目與造過土木工程通行類造黃冊一本差人

奏繳青冊一本送部查覈等因得違違未便抄案依准同委過官員職
名一併呈來等因蒙此為照已故太子太保兵部尚書陶 造墳
夫匠價銀共五百兩合無候詳九日備行平陽府掌印官即查
屬備用銀多州縣酌量多寡依數派辦如或不敷就於本府收照
無碍銀內轉補務足原數仍坐委本府佐貳官一員前去造墳處
所專一管領買辦依式造葬畢日仍將派取過銀兩州縣支用過
價銀買辦過物料匠作支用過工食各數目備造文冊送司類繳
青冊送部查考緣係動支錢糧委官造墳安葬事理本司未敢擅
專擬合通行呈請為此除呈巡按衙門照詳外今將前項緣由理
合具呈乞為照詳施行等因蒙批依擬行府派取銀兩委官管造
工完具數繳續蒙巡按山西監察御史王 批批本司經歷司亦
呈前事蒙批查照巡撫衙門批示施行繳蒙此案照已經通行呈
請去後今蒙前因擬合通行為此除外劄仰本府着落當該官吏
照劄備蒙批呈及題奉

欽依內事理轉行掌印官即查所屬備用銀多州縣酌量多寡依數
派辦如或不敷就於本府收貯無碍銀內轉補務足原數仍坐委
本府佐貳官一員前去造墳處所專一管領買辦依式造葬畢日
仍將派取過銀兩州縣支用過價銀買辦過物料匠作支用過工
食各數目緣由備造青冊一本送司類繳先將委過官員職名申
來以憑施行毋得違錯不便奉此已經備行本府通判張雲鵬管

理造葬去後查得本官先蒙守巡河東道公委蒲州署印去訖擬合改委為此除布政司呈允祭葬價銀另行外合行帖仰本州着落當該官吏照帖備奉劄付批呈及題奉

欽依內事理速行同知崔筮前去造墳處所專一管理買辦依式造葬畢日仍將支用過價銀買辦過物料匠作支用過工食各數目緣由備造青冊二本送府以憑轉報施行仍具委官職名同不違依准先行申來查考毋得違錯不便須至帖者

右帖下絳州准此

嘉靖十二年三月初七日

帖押

明致仕光祿大夫太子太保南京兵部尚書贈少保謚恭介陶公

神道碑銘

賜進士榮祿大夫太子太保吏部尚書兼

武英殿大學士知制誥經筵國史總裁官河間李時撰文

賜進士榮祿大夫太子太保吏部尚書婺源汪鉉書丹

賜進士資政大夫工部尚書無錫秦金等奉額

予性讀史傳則知絳故多名賢于宋有薛簡肅公者歐陽公稱其亮直剛毅為時名臣予心敬之而今恭介陶公則又絳人也公諱琰字廷信別號逸菴其先高祖子敬曾祖伯清祖春皆隱德不仕考銓乙丑進士累官陝西右叅議致仕而祖若考皆累贈尚書祖

姓若妣皆累贈夫人云公幼而穎異長而膏敏舉成化辛卯省試
第一登辛丑進士丁外艱服闋授刑部四川司主事弘治戊申陞
山東司員外郎故事刑部以獄訟繁劇奏誠惟艱擇老成明練者
典部章疏謂之本科時大司寇特以任公凡諸章疏無不委曲盡
情事者而諸司有疑事亦輒以屬斷比歲審錄又多所平反上下
稱明焉未幾陞陝西按察司僉事癸丑陞副使整飭固原固原為
西邊要害唐陷于吐蕃宋沒于西夏成化初滿四之變三鎮幾挫
固天下至險要區也公至練士卒繕器械廣芻粟積數年邊無警
檄居人以安辛酉陞福建按察使公去任未逾月而固原告變自
是以後

朝命大臣總制經畧修浚隄設日無寧居而全陝之民始疲矣公在
福建廉介絕俗每飯惟一蔬及陞浙江布政使半載積羨銀三千
餘兩悉入官帑至今閩浙士夫言廉者猶曰陶公陶公云公在浙
時言官會列藩臬之賢者薦于

朝而以公列置第一于是陞都察院右副都御史巡撫河南至則首
黜賊吏黃金寶等屬吏震懾有望風解印綬者丁卯陞刑部左侍
郎適陝西遊擊徐謙誣奏御史李高而謙故豎瑾黨也又厚賂瑾
欲中高以危法會

上命公往覈其事公據法直高謙以告瑾瑾怒遂矯

詔下公獄禁錮幾兩月乃罷官去瑾怒未已復兩以他事罰米四百

石又追奪

誥命是時瑾執方焮烈矢迅無敢抗犯即舊有犯者率首鼠謝過幾脫死而公獨安之弗懼也庚午秋瑾伏誅言官交章論薦

詔起公左副都御史總督漕運兼巡撫鳳陽人謂公新懲逆瑾之禍且委曲就宦而公復抗節不少改聞

命單車至鎮至則廉得諸幸堅官民之豪滑者悉治以律權勢欽手且淮乃南北噤喉貢獻必由之路中使往返求索無厭而督運武臣又徃、侵漁其間為奸利事軍民病焉公榜諭以法常廩之外一毫不少假而又率以勤廉俾知警畏未嘗有一人敢犯禁者辛未轉南京刑部右侍郎壬申七月河北賊刘六自北而南犯魏源洞賊王浩八自西而東犯狀聞

天子命廷臣會推才望大臣總諸軍事廷臣以公上

上可之陞右都御史至則刘六已殄滅王浩八已聽招撫人心甫安

而寧紹瀕海屬邑颶風大作海堤毀者三百里居民漂溺者以萬

數公聞之憂甚乃親按其地亟出帑銀多方賑救遂生萬餘人仍

委官築堤捍水自蕭山至餘姚凡五萬餘丈公憲姚源賊譎詐難

信乃奏設兵備及簡拔群寮之有才者分守要害處置周悉明

年春前賊果率眾突入境公亟臨督戰賊潰走乃進兵襲之餘黨

悉平捷聞賜璽書獎勵陞俸從一品又賜白金文綺有差賊

平之後公以開化常山遂安蘭谿為盜出沒要衝乃議城四邑凡

六閱月而訖工公因引疾求退

詔不許會總漕貢缺復推公往督之公至淮一如前令然乞歸志益堅疏凡七上皆

溫旨褒答最後乃得請仍許乘傳歸歲給祿隸皆一時異數也公家居垂七年 廷臣薦者凡十餘疏辛巳夏

今上登極乃復起公總督漕政公于是三蒞茲任矣淮民喜公之來迓于道左歡聲雷動尋進戶部尚書兼左副都御史壬午改工部尚書啓行之日淮民傾城出送獻歎號泣至易履以著去思云是年冬三載秩滿 詔賜羊酒寶鏹癸未改南京兵部尚書加太子少保叅贊機務公至南都屬歲飢死者相枕藉乃移文諸曹盡出其所積以助賑濟仍咨戶部預給軍糧數月用是米價頓平人賴以生者無算事皆已行而後具

聞而又裁抑內臣進貢快船其數視常減半至今官民賴以弗擾時公年七十有五累疏乞休言官疏乞慰留者再又具疏乃得請

詔加太子太保給驛歸如故仍令有司歲時以禮存問繼又

賜詔褒嘉至今以為盛典公抵家而言官猶每疏乞起用戊子奉

恩詔命有司綵帛羊酒勞問進階光祿大夫公有別業在城西二里許汾水之陽鑿池種蓮開徑植菊每風日晴和輒命童子携筆床茶竈引肩輿造之徘徊其間或據榻吟哦寄情翰墨人望之如神仙未幾以疾卒時嘉靖壬辰七月十九日也訃聞

上震悼為輟視朝贈少保謚恭介 諭祭九壇

詔工部給棺木及遣官治墳屯田司觀政進士嚴君實寔奉

命以行公天性至孝四時祠廟有事雖老猶夙興率子孫躬養

處宗俗以厚遇鄉黨以恩有窮困失所者恒捐金濟之有

之以棺平居嚴毅人不敢干以私自奉節儉自常祿外一

雖交遊贈遺一無所受每罷歸行李蕭然惟三竹筥而已予惟豪

傑之士所以自待者恒卓犖不群而率為習俗所移故勵初心者

久而或變非氣盈于居養則志歉于執賄求其始終一節久而不

渝若恭介公者蓋無幾也公自登第以及膺仕理繁劇禦寇盜屢

試于盤錯而又守官轟然才足以濟其行立朝侃侃居鄉嗇嗇

抗權奸清鎮雅俗至老而貞方不詭少壯一節上下交與謂非亮

直剛毅為世名臣者哉公配李氏先卒累贈夫人繼陳氏封夫人

麻氏李氏子男三長曰滋麻氏出登甲戌進士授行人正德時以

諫謫國子學正復迂刑部郎中改兵部又以議

大禮謫戍榆林次曰治蔭授右軍都督府都事以公老終養次日沐

早卒皆李氏出女一孫男九孫女一曾孫男四曾孫女四載之志

者詳矣予故弗著乃撮其大者為之碑銘曰

英英陶公惟國之良秉心弗越令德有光惟時

純皇公寔筮仕勅法于廷出陳臬事屹屹西邊中華要區乃公臨之

三鎮無虞桓桓中丞河洛以寧載陟司寇執憲明明時有逆豎敢

奸國紀乃公抗之中蹶而起乃起乃陟攬轡江淮轉漕以給豪奸
是摧粵茲小醜弄兵于南乃公拔鉞鯨鯢之虺乃捷乃聞

天子燕喜何以賜之南金文綺於

皇中興壽耆是庸公歸而來乃陟司空

皇眷南顧金陵舊基

命公留守作周保釐惟公屹屹四輔以式公曰歸哉功成身逸望重

四朝壽愈八齡奉身進退以保榮名子有遺經鄉有懸車考終上撤

卹典則殊煌

綸命隆佳城弘錫休謚晉位孤鄉於惟陶公不顯亦世子銘崇碑
以表求譽

致仕太子太保南京兵部尚書陶公行狀

公諱琰字廷信別號逸菴世居山西平陽之絳州七世祖貴貴生

諶然生瑞甫生子敬生伯清是為公之曾大父皆隱德不

仕祖考諱春累贈資政大夫戶部尚書兼左副都御史考諱銓乙

丑進士累官陝西右叅議所至有惠政有司以鄉賢祠之贈如公

官祖妣梁氏妣李氏皆累贈夫人公生有異質年十七補郡庠生

成化辛卯舉鄉薦第一卒業大學大司成盧氏耿公每試見所作

文擊節稱賞且以示諸生為式丁酉丁母憂辛丑登進士壬寅丁

少叅公憂服闋授刑部主事弘治戊申陞本部員外郎大司寇特

於群寮中擇公專典章疏諸司有疑事輒以屬斷每當審錄之時

推情原法有可矜疑者議請

上裁多得末減凡全活斬絞重囚五十餘人已酉陞陝西按察司僉事癸丑都御史王公宗彞御史張君文薦陞本司副使整飭固原等處兵備固原為西邊要害唐陷于吐蕃宋沒于西夏成化初滿四之變至勤王師公至練士卒繕器械峙為粟以故八九年間邊無警檄居人皆陰受其惠公去任未踰月遽以變告是後始

命大臣總制經畧修城浚池掘險設備而全陝之民力日疲矣公嘗舉一邊將其人懷百金為謝公正色却之其人慚赧而去辛酉陞福建按察使公慎於用刑詳讞精允至忘寢食且每飯惟一蔬間人謂之青菜陶云甲子陞浙江右布政使浙稱巨藩簿書增積公

制裁若流甫半載所積羨銀三千餘兩悉貯官帑乙丑轉福建左布政使公在陝十有四年在閩浙幾五年前後為撫按旌舉凡二十餘疏南京科道沈賚等會列天下方面之賢者薦于

朝以公居首給事中許君誥稱公謹於操修優於政事富於文學全於氣節乞

勅吏部不次擢用時諸撫臣缺銓部四以公舉皆未報正德丙寅調山東左布政尋陞都察院右副都御史巡撫河南至則溥仁惠振大綱平徭役減科稅首訪于衆得知縣黃金寶等貪婪之跡皆黜之屬吏震懾丁卯陞刑部右侍郎適陝西游擊將軍徐謙訐奏巡按御史李高謙厚賂逆瑾欲中傷之瑾

奏差公往勘其事公惟持法不桡枳實以

聞大拂瑾意矯

旨下公獄禁錮五十餘日乃落職瑾猶銜之復中以他事罰米一百石庚午又追奪

誥命罰米三百石是年秋瑾伏誅言官交章論薦下

廷臣議僉謂公去官非罪起既左副都御史總督漕運兼巡撫鳳陽公單車至鎮廉得監倉內臣五人及指揮張鏜知縣田疇富豪陶麟等皆縱橫不法害地方恃有與援莫敢誰何公散遣監倉僮隨究治脅從群小及窮張鏜等姦貪罪惡繩以重法權勢斂手且淮乃東南貢獻必由之路中使往返求索無厭軍民罹其毒荼

有不可言公出榜曉諭禁其侵漁常廩之外一毫弗予軍民得以蘇息先是督運官負科索運軍刁難糧戶以致餉運愆期公乃率以勤廉咸知警畏未嘗有一人敢後遇

恩詔獲贈二代如制辛未轉南京刑部右侍郎時有姚姓者財雄南京初訟家資因訐諸不法事鞫問得實姚乃廣行賄賂欲脫其罪公堅執初詞不為變竟坐之人以為快壬申河北賊劉六等自北而南犯浙之嘉興姚源賊王浩八等自西而東犯浙之衢州鎮巡官以狀聞

命吏部會推素有才望着實幹事官來看 廷臣會推以公宜往上可之陞右都御史降

初諭仍給關符旗牌聽便宜行事至則劉六等即殄滅王浩八等皆聽招撫人心甫安其寧紹濱海屬邑颶風八作怒濤撼天海堤激蝕者幾千里居民漂溺者幾數萬公聞之憂乃親臨其地亟出帑藏銀兩多方賑救八萬餘口咸得更生仍委官築堤捍水自蕭山至上虞山陰會稽餘姚凡五萬五千五百餘丈堤之高三文許其廣倍之堤之旁皆植以柳民乃奠居當未築堤之前堤內之地萬餘頃皆為潮水所侵是後皆為良田又無賦稅咸感公惠立石以紀之公復憲姚源賊情請詐難信乃

奏設兵備一員及簡拔群寮之有才者以僉事儲珊守開化叅議段敏同知伍文定守常山僉事吳希由汪大章守遂安知府劉斐率土兵為常化援副使鄭陽率所部兵為遂安援知府劉權若千員或兵或餉靡不周悉越明年春前賊果率眾突入境公亟臨督戰始則分地而居量方以進既而我師大集一戰平其壁壘再戰搗其巢穴賊冒雨宵遁復令官兵追襲根孽俱盡俘馘之際未嘗妄及一人安集賑卹咸得其宜仍請于

上為免開常二邑賦役是舉也不惟浙東獲安而江西亦賴以寧謐矣捷

聞賜重書獎勵加俸從一品又

賜白金一鎰獬豸文綺二襲其餘賞功有差賊平之後公以開化常山遂安蘭谿為盜由衝也皆城之以石凡六閱月而功告成民立

生祠祀之公因引疾求退巡按御史王君克封奏稱公今年六十有五筋力耳目未覺衰老精神智憲猶比少年且為人清苦議論平正才識老成見義必為憂國忘家用意深遠所謂朝之老成者在此數月請蠲租賦以贍民窮請停織造以寬民力請開墾以助軍餉請罷不職以除民害修築海塘以救災卹患節減無益以厚本抑末及軍中調兵集糧知人善用分任責成至於鎮重安靜不求赫赫可喜之名每有懇愛民之實在

朝豈能多得當勉留以靖地方會總漕員缺復推公往督之公再至淮權貴聞風而惧漕政不勞而舉受

命後年而求退疏凡七上皆

溫旨褒答最後乃得請仍許乘傳還鄉月給食米歲撥夫役皆一時異數云公家居垂七年都御史張公禴御史張君鵬交章稱公發跡秋臺而刑書精練歷官諸省而國事深諳巡視鑑湖而越人遠近傾心督理糧運而淮上声称肆出貞方不詭沉退自甘豈獨有識深知兼為流俗所重宜超拔起擢響用

明時以畢其平生期待未盡之蘊御史甯君欽奏稱公歷官三十餘年履素無瑕才智優於機務德望重於

朝野顧乃一旦以二品輕於鴻毛而樂就烟霞七疏介于金石而乞歸田里年雖踰耆顏則如童閉戶山莊手不釋卷或時而作大字或時而作細書耳目聰明精神矍鑠正可以列卿相而分理庶務

居師保而貳總百官不宜置諸閒散辛巳給事中齊君之鸞奏稱
公清介絕俗足以當新政之舉御史任君洛周君宣南京給事中
孫君懋等交章稱公操持端正才望優隆即今精力康健累經言
官薦舉乞將本官擢用則經國裕民必有攸濟又曰
先朝耆舊德業並茂引年自善莫非人望之所屬者也宜即起用俾
得及時展布

今上登極廷臣會推復起總督漕政公於是三蒞茲任矣先是淮城
淫月公下車之日天忽晴霽淮民喜公之來迓於道左歡声雷動
尋進戶部尚書兼左副都御史嘉靖壬午改工部尚書啓行之旨淮
人傾城出送皆歔歔號泣声振原野留公雙履以著去思至京奉

詔待 經筵是年冬二載考績蒙

賜羊酒寶錫公在部未及期恭勤憂惕夙夜罔懈省無益之財費停
不急之營造抑貴戚之請求每疏入

上輒嘉納癸未改南京兵部尚書加太子少保參贊機務公至南都
屬歲飢死者相枕藉乃移文諸曹盡出其所積以助賑濟仍咨戶
部預給軍糧數月用走米價獲平人多賴之事皆已行而後具

聞每與內外守備官論可否詞嚴義正不少假借凡內臣進

貢快船每裁抑其數視常減半罔擾于官御史曹君嘉品第四品以
上京官分為四等公居首列時公年七十有五累疏乞休

上弗允給事中彭君汝宣南京六科給事中魯君綸等南京十三道

御史唐君勳等文章稱公歷任年久多著勤勞簡在

帝心非一日矣其以疾求退亦不止一次矣即今年七十有五臣見其髮黑身輕目明齒固誠有矍鑠之氣又况存心正大處事精明盖彌老弥堅者也又曰宿望重望

陛下用之於此惡乎不宜也本官到任甫旬日已有乞休之疏未數月而四上請休矣况南宮百萬軍士張口待哺若非參贊處置得宜則往者寧夏滔天之變可監矣今日參贊不可一日無也伏望

皇上念根本重地憫時事之艱切加

慰留以答時望癸未秋又曰陳詞甚懇切至是凡十疏矣

上批荅曰卿以

先朝耆舊自起用以來慎重法守屢進謹言等語繼又

賜璽書有曰卿以宏才偉器累試繁難所至有声勤勞茂積中間坐忤權倖屢進屢退喜愠不形清修直亮時論避之乃者特加宮保進大司馬俾司留鑰豈惟資壯猷以濟時艱亦將假耆德以鎮雅俗人以為實錄云公既抵家御史朱君光浦君鉉王君泮劉君廉各疏稱公清謹素聞老成練達誠一世之偉人也又曰執法不撓清白無瑕鴻儒碩德世不多見伏望

收回致仕成命未行則遣官慰留既行則差官禮請用之不貳任之不疑則災異可弭太平可致天下幸甚社稷幸甚又曰賦清苦耿介之操有明允純篤之行忠孝一節素所蓄積伏願

陛下惜老成忠愛之臣速

賜召還任以提督三邊戎務則西北諸邊得高枕無憂也戊子奉

恩詔命有司具綵帛羊酒勞問吏部復具題進階光祿大夫公感激

泣下具疏謝 恩且諭諸子若孫曰吾家三世受

六朝厚恩茲又蒙異數顧吾老無能自効爾曹其務竭犬馬之力以

圖報萬一公有別業在城西二里許汾水之陽鑿池種蓮開徑植

菊每風日晴和輒命童子携筆床茶竈引肩輿造之緋袍玉帶鶴

髮童顏人望之如神仙縉紳時過訪相對危坐未嘗見惰容暇則

據榻吟哦或大書或行草惟意之適公少年能飲老而消滴不入

口今年七月初旬偶嬰熱疾遂不起時嘉靖壬辰七月十九日也

享年八十有四距其生則正統己巳四月十五日也訃聞遠近雖

田夫野老亦為之洒泣公天性至孝四時祠廟有事雖老猶夙興

率子孫躬奠如儀處宗族以厚窮困失所者恒捐金濟之親隣有

喪貧弗克舉者則助以棺木周以泉布弗責其報居官鎮靜不求

赫赫之名而中自有定見泊于世味不汲汲于進先後家居近二

十載安於閑逸若將終身焉者平居節儉奉身無長物適口無兼

味自常祿外一毫不取雖交遊贈遺一無所受每歲歸行李蕭然

惟三竹筥而已大司徒秦公嘆曰來三扛去三扛官之一槩一鶴

何異平生嚴毅人不敢干以私訓迪子孫義方甚切非有問不敢

輒言他事為詩文渾厚雅正不事雕琢所著有歸田稿若干卷藏

于家配李氏先卒累贈夫人繼陳氏累封夫人皆有賢行以儉佐
廉內助之功亦多初公年三十餘未立嗣夫人為置側室麻氏李
氏視之咸有恩子男三長曰滋麻氏出登甲戌進士授行人正德
時以直諫謫國子學正迂司正刑部郎中改六部嘉靖初又以議
大禮謫戍榆林次曰洽蔭授右軍都督府都事以公老懇乞終養次
曰沐早卒女一適監生張鈺皆李氏出孫男九曰介曰元曰允曰
方庠生曰中庠生曰祐曰守曰仕曰貞孫女一適庠生陳諤曾孫
男四曾孫女四皆幼嗚呼公廉慎剛介質誠無偽其平生操履出
處無愧古之名臣諸言者論列備矣茲不敢贅云
中憲大夫太常寺少卿兼翰林院侍書晚生劉鈞謹狀

致仕光祿大夫太子太保南京兵部尚書贈少保謚恭介陶公
墓志銘

賜進士第光祿大夫太子太保禮部尚書兼翰林院學士前詹事

府少詹事


經筵日講官

祀典副總裁貴溪夏言撰文

賜進士通議大夫戶部左侍郎信陽張雲書丹

特進光祿大夫柱國駙馬都尉京山侯鴈門崔元篆蓋

嘉靖壬辰七月十九日太子太保南京兵部尚書陶公卒越明年
十二月將葬于州北侯庄之原公子滋治持太常少卿劉君鈞所
為狀來請予銘予素熟公之為人遂不復辭按狀公諱琰字廷信
別號逸菴世居山西平陽之絳州始祖貴貴生湛然湛然生瑞甫



原件破损

瑞甫生子敬子敬生伯清伯清生春為公之祖皆隱德弗仕後以公貴祖贈資政大夫戶部尚書兼左副都御史父銓登乙丑進士累官陝西布政司右參議所至有惠政亦以公貴贈如祖官祖母梁氏母李氏並贈夫人公生有異質長為諸生成化辛卯舉鄉薦第一辛丑登進士第授刑部主事陞本部員外郎大司寇擇專典章疏諸司有疑事輒以屬斷時當錄有可矜疑者議請

上裁多得未減己酉陞陝西按察司僉事以撫臣薦陞副使整飭固原兵備至練士卒繕器械峙芻粟八九年間邊無警擢陞福建按察使公慎於用刑詳讞精允每飯一蔬閩人謂之青菜陶陞浙江右布政使轉福建左布政使時南京科道會列天下方面之賢者

薦于

朝以公居首時諸撫臣缺銓部四以公舉皆未報正德丙寅調山東左布政使尋陞都察院右副都御史巡撫河南至則溥仁惠振大綱平徭役減科稅黜貪婪丁卯陞刑部右侍郎會往勘陝西巡按御史李高遊擊徐謙事持法不撓大拂瑾意遂矯

旨下公獄乃落職瑾伏誅言官交章論薦起為左副都御史總督漕運兼巡撫鳳陽公單車至鎮廉得監倉內臣及指揮張鏜等不法事皆置之於法權勢斂手以淮東南

貢獻孔道中使求索無厭公嚴為禁令常廩外一毫弗與軍民賴焉先是督運諸武職科索貧軍貽累糧戶以致餉運愆期公乃率以

勤廉咸知警畏未嘗有一人敢後辛未轉南京刑部右侍郎時河北賊劉六自北而南犯浙之嘉興姚源洞賊王浩八自西而東犯浙之衢州

上擢公為右都御史命徃征焉給關符旗牌聽便宜行事至則劉六已殄滅王浩八已聽招撫人心甫安其寧紹瀕海屬邑颶風大作怒濤撼天海堤激噬者幾千里居民漂溺者幾數萬公適承

命祭南鎮乃親臨其地發帑藏多方賑救民得更生仍令築堤捍水自蕭山至上虞山陰會稽餘姚凡五萬五千五百餘丈堤之高三丈許其廣倍之堤之旁皆植以柳民乃奠居咸感公惠立石紀之公復慮姚源賊情譎詐難信乃

奏設兵備一員及簡拔群寮之有才者督兵餉明年春賊果率眾突入境公亟臨督戰平之安集賑卹咸得其宜

賜璽書獎勵加俸從一品又

賜白金一鎰獬豸文綺二襲既而復以開化常山遂安蘭谿為盜由衝也皆城之六開月功告成公因引疾求退巡按御史王堯封奏稱公守節清苦憂國忘家當勉留以靖地方會總漕員缺復推公徃督之公再至淮奉公守法政譽有加于前受

命數年而求退疏凡七上皆

溫旨褒答最後乃得請仍許乘傳還鄉月給食米歲撥夫役皆一時異數云公家居垂七年巡撫都御史張禴巡按御史張鵬甯欽任

洛以及給事中齊之鸞孫懋等交章稱公才望優隆宜起用俾得及時展布辛巳夏

今上登極復起公總督漕政公於是三蒞茲任矣淮民喜迓於道左尋進戶部尚書兼左副都御史壬午改工部尚書啓行之日淮民傾城出送有歎歔號泣者留公雙履以著去思癸未改南京兵部尚書加太子少保參贊機務屬歲飢移文諸曹盡出其所積以助賑濟仍咨戶部預給軍糧數月用是米價獲平人多賴之時公年七十有五累乞休

上弗允給事中彭汝寔魯綸等御史曹嘉唐勳等交章稱當慰留以答特望是年又具陳詞甚懇切至是九十疏矣

上批荅曰卿以

先朝耆舊自起用以來慎重法守屢進讜言新政之初方切委任乃回求休逸再覽今奏益見懇切忠愛至意特允所請還加太子太保駕勒着馳驛還鄉有司月給食米三石歲撥人夫四名應用歲時以禮存問繼又

賜璽書有曰卿以宏才偉器累試繁難所至有声勤勞茂積中間坐忤權倖屢進屢退喜愠不形清修直亮時論躋之乃者特加宮保進大司馬俾司留鑰豈惟資壯猷以濟時艰亦將假耆德以鎮雅俗人以為實錄云公既抵家御史朱洗浦鉉王泮劉濂各疏稱公老成忠愛清謹素聞年雖七袞精力不衰宜即

召還戍子奉

恩詔命有司具絲帛羊酒勞問吏部復具題進階光祿大夫公有別業在城西二里許汾水之陽鑿池種蓮開徑植菊每風日晴和輒命童子携筆床茶竈引肩輿造之披榻吟哦或大書或行草惟意之適今年七月初旬偶嬰疾不起距其生則正統己巳四月十五日訃聞

上悼念不已再

賜誥贈少保謚恭介仍遣官

諭祭營葬公天性至孝四時祠廟有事雖老猶夙興率子孫躬奠祀宗族以厚窮困失所者恒捐金濟之親隣有喪貧弗克舉者勸助

以棺木周以泉布居官鎮靜不求赫赫之名而中自有定見泊于世味不汲汲于進先後家居近二十年安於閒逸若將終身平居節儉奉身無長物適口無兼味自常祿外一毫不取雖交遊贈遺一無所受每罷歸行李蕭然惟三竹筍而已大司徒秦公嘆曰來三扛去三扛是與一琴一鶴何異為詩文渾厚雅正不事雕琢所著有歸田稿若干卷藏于家配李氏先卒累贈夫人繼陳氏累封夫人皆有賢行以儉佐廉內助之功亦多初公年三十餘未立嗣夫人為置側室麻氏李氏視之咸有恩子男三長曰滋麻氏出登甲戌進士授行人正德時以直諫謫國子學正復遷司正刑部郎中改兵部嘉靖初又以議

大禮講成榆林次曰治蔭授右軍都督府都事以公老終養次曰沐
早卒女一適監生張鈺皆李氏出孫男九曰介曰元曰允曰方庠
生曰中庠生曰祐曰守曰仕曰直孫女一適庠生陳謬曾孫男四
曰治曰阜曰鴻曰范曾孫女四一聘童生陳栢餘皆幼

銘曰

宏才偉器維國良也績勞樹聲明德汪也進札退義介何方也累
黜累起其道光也事列朝榮太史藏也耆英高風冠厥鄉也慶流
逢蠲涌昭厥祥也琢辭貫幽播遺芳也

維嘉靖十二年歲次癸巳十月癸亥朔越十三日壬午 太子太

保吏部尚書汪鏞左侍郎顧鼎臣右侍郎席春戶部尚書許讚左

侍郎張雲右侍郎張瓚黃芳 太子太保禮部尚書燕翰林院學

士夏言左侍郎黃綰 太子太保兵部尚書王憲左侍郎錢如京

右侍郎寇天叙刑部尚書聶賢工部尚書秦金左侍郎林庭楫右

侍郎甘為霖都察院左都御史王廷相右僉都御史胡東臯通政

司通政使陳經左通政鄭紳右通政杜棟左參議劉繼德右參議

蔡子舉大理寺左寺丞周鳳鳴右寺丞雷簡之張景華致祭于

太子太保兵部尚書贈少保謚恭介古絳陶老先生之靈曰嗚呼維

公天地之紀河汾之英冲和茂著忠信夙成鴻飛鳳立玉粹金貞

激揚清芬騰騫令名摘華振藻羽儀清朝秉心不爽執政無撓峻
節終始冰蘖孤標殊動中外雲漢孔昭監司風采政通比屋至今
秦隴猶訟公牘保釐淮海惟惠惟肅漕務既修人歌涵育二鄉農
部翼亮惟賢司空晉掌嘉猷式宣五典教敷四民居全謨明弼諧
垂之國編嗚呼公在于朝天下之福帝載用熙皇風以穆公在于
野天下之望子儀未衰君實復相嗚呼公今已矣逝川不返青山
一丘樓真宅寂造化同遊死生常數子又何求慕公之烈陳此庶

羞尚饗

維嘉靖十一年歲次壬辰九月丙午朔越三日戊申

欽差巡撫陝西等處地方都察院右副都御史王堯封陝西左布政

使黃臣謹以剛鬣柔毛段紗之奠敢昭告于

故宮保陶老大人逸翁先生之靈曰維公韶年睿英唾手發解光

焰騰文萬文豪邁憲府馳譽執法清嚴由僉徂副風霜愈添能厚
政成薇垣屢蒞弗黜於刑弗傷於惠兩浙雄鎮

詔公巡撫四道循軌萬閩生春賦性平生德規道矩萬鍾可辭一介
不取大卿峻陟若固有之罔著乎色罔宣乎辭上埤一德下振萬
法人服凜頌口喋々

勅褒絕俗御墨猶存受知

當宁萬感

天恩安車蒲輪幡然再起視政冬官無往弗理松楸入夢俄命歸舟

樂天安土此外何求優游七年養高林下韓公醉白裴老綠野胡
然一夢觀化不回典刑失範斯人生哀西風發兮吹來有訃身羈
關中撫膺遙哭敬將薄奠聊表愚衷 神其鑒思罔然罔悃尚
饗

維嘉靖癸巳夏五月癸卯朔越九日辛亥

欽差提督鴈門等關兼巡撫山西地方都察院右僉都御史通家晚
生陳達謹以牲醴庶羞之奠致祭于

太子太保南京兵部尚書贈少保謚恭介陶老先生之靈曰惟

公鍾河山之秀際治化之隆蘊經濟之學抱悃款之忠勵耿介之
操敦儉素之風進退以禮險夷攸同八表矍鑠一品尊崇聞孫

子善始克終信人間之全福誠舉世之竒逢詎三晉之人物允天
下之宗工唯

昭代之房杜媿上古之夔龍達在諸生叨辱教愛亦偕震器忝曰寅
恭顧撫茲土之既晚媿領清誨之無從臨風一酌庸表寸中

公神在天庶幾感通嗚呼哀哉尚 饗

維嘉靖十二年歲次癸巳十一月己亥朔越二十日丁卯 太子
少保禮部尚書門生李浩謹以清酌庶羞之奠致祭于

太子太保兵部尚書恭介公陶老先生之靈曰惟靈天地間氣河嶽
降神德位隆重名壽並臻表儀朝著作式後人山頽梁壞吾將孰
遵嗚呼哀哉尚 饗

維嘉靖十二年歲次癸巳正月甲辰朔越十九日壬戌鄉晚生京
山侯崔元大理寺寺丞靈問之戶科給事中高金監察御史朱方
戶部郎中李克中工部郎中韓廷偉戶部主事李新芳竇一桂張
九叙張冕刑部主事張好古中書舍人張湘司務白金車燦崔紳
王璧翰林院庶吉士閻樸鴻臚寺序班李金玉佩樊龍張汝諧進
士申用休郭塏路天亨張梯謹以香帛庶羞之奠致祭于

兵部尚書少保謚恭介陶公之靈於維 先生弱冠味道探蹟研幾
克岐克嶷知章知微登名甲科列官司寇載陟憲臺主刑陝右折
獄明慎讞辟端詳聽衆舉呂稱馱于張獯鬻犯威環靈躋蹶
帝咨虎臣授以節鉞乃整師旅乃積芻菽胡騎宵奔不敢南牧掌憲

閩越宣化齊魯操縱弛張秋霜春雨中丞

簡命撫彼中州惠訓不倦辰布遠猷擢亞秋卿佐掌邦禁詰慝摘奸
克艱厥任逆豎構誣矯

詔除籍飲牲丘園杜門絕跡元凶授首登庸耆舊

詔進都臺駢錫組綬督司漕政制度立經訂謀長策邦國典刑厚澤
深仁淪肌浹髓眷彼淮人肇祠以祀籌兵嘉杭奄靖巨敵築隄海
洋民罔墊溺司徒司馬重寄屢托

寵以宮階往守留鑰倚毗方殷林壑動念琴鶴歸來履祥無瑕於維
先生

累朝耆德昭代人豪精成有孚清介不撓進退維時出處比義喜愠

罔形隱顯一致完名全節古哲為難青天白日對此肺肝訃上
天王懋官治祿誅德策勲考終定謚元等鄉閭末學夙嚴仰止頃失
依歸曷勝煩悃蠲備香繒齋奠几筵於乎不昧 靈其連蜷尚饗
維嘉靖十二年四月初二日山西等處承宣布政司分守河東道
右叅政晚生曹嘉頓首百拜敢昭告于

光祿大夫太子太保兵部尚書贈少保謚恭介陶公之神曰惟

公簪組

四朝勲名久著杖輿八袞福德兼隆固

聖代之所優崇 國史之所褒贊者也嘉昔嘗言路嘗勤品薦之高
今蒞郡鄉益切瞻依之盛顧劔履已潛於幽壤而箕裘猶振乎先

風表墓題阡豈盡長懷之意陳芻酒祭聊伸如在之誠尚 饗

維嘉靖十一年歲次壬辰朔越十九日小人府經歷劉時用中府
經歷趙善鳴都事王儼左府經歷屠佶都事徐有讓右府經歷石
經都事楊木前府經歷郭鳳都事王下儉後府經歷趙岳都事韓
勛謹以香燭牲帛之儀致祭于

太子太保兵部尚書贈少保謚恭介逸菴陶公之靈曰於惟 先生
廉儉律身慈愛被物功著于用名副其實顯不能榮困復不屈八
十四年敬而無失夫先生爰自發解知名以至屬纊之日適口無
兼味奉身無長物嚴一介於贈遺揮賄賂如塵拂青菜有謠三扛
有嘆若此者可不謂之廉儉矣乎處空公則厚宗族而潛閭閻居官

則急賑濟而禁侵漁於浙築長堤以捍水建石城以禦盜若此者可不謂之仁愛矣乎先生筮仕于刑曹則疑獄有未減之仁飭兵於陝則邊無警檄堂憲蒞岳于閩浙山東則用刑精允官帑餘饒迭迂兩京巡撫于河南鳳陽三總漕運三拜尚書官歷五部其間振綱溥惠抑擠權執平賊衛民所至皆有奇勲偉績若此者非其功之著于用矣乎先生歷陝歷閩歷浙訖二十餘年撫按旌舉者二十餘疏敷歷中外而科道撫按之交剡薦揚不可歷數至於

重書獎勵

溫旨褒嘉又非尋常可擬若此者非名之副於實矣乎先生爰自十七遊庠書生一介官至尚書緋袍玉帶乃視如固有不驕而泰若

此者可不謂之顯不能榮矣乎先生持法不撓忤拂瑾賊禁錮靡恣罰羅織先生視之恬然久之而公論自白若此者可不謂之困而不屈矣乎至於歸閑之日縉紳相過終日危坐畧無惰容四時家廟獻享必躬若此者可不謂之敬而不失矣乎是故廉儉律身存乎義慈愛被物存乎仁功著于用存乎材名副其實存乎德不榮不屈存乎定而敬而無失實所以主乎數者也噫敬以主定仁義材德兼該若先生者庶乎其全人矣謚曰恭介固先生之尤長者歟嗚呼天下方懸山斗之仰斯民猶有福星之望而先生之訃聞矣嗚呼等與賢嗣治賤屬僚案齒屬後生聞訃與悲遽失典刑臨風瞻悼曷已乎情致茲薄真用伸菲誠嗚呼尚一享

嘉靖之十有二年維歲癸巳維月丙辰維日壬子晚學生嚴寬謹
剗羊擊豕致祭于

故太子太保兵部尚書謚恭介陶老先生之靈曰嗟乎我公汾嶽秀
鍾方其生也固本基道質直溫文進退順化於維哲人為天地之
正氣為國家之鼎鍾為江淮之舟楫為邊鄙之干城及其終也則
化為日星朗而天行士民其懷嗚呼曷從於是又有哭諸其廟者矣
於是有哭諸其寢者矣於是又有哭諸其野者矣於是又有哭諸廟
門寢門之外者矣嗟乎公乎萬夫之雄人孰無生公生何榮人孰
無死公死何悰壽考令終既順且安死生晝夜死生何憾嗚呼此
猶夫人之見也此亦知公之淺者也孰知夫公有令德日新富

有維富則大維新則久維大而久是曰不朽孰知夫公有令聞久
且益昌不以生存不以死亡維久而昌是曰無疆孰知夫公有令
子德音是嗣鯁言不回欽厥汝止其仕雖艱其道則是為邦之直
為儒之紀雲仍綿是曰不死於此見公之年雖止八袞而所以
為壽者又寧有窮乎哉寬生較晚然仰公之德慕公之名登公之
堂侍公之子不穀雖不德猶覺有興起焉者而況於親炙之者乎
因從而為之辭曰大雅不作兮大音希聲渾淪既散兮民俗乃更
惟仁人之抱一兮先厚重以處中為夫斯民之具瞻兮回狂瀾於
既東殫乃心兮竭乃忠懋乃德兮厥功乃豐曷云其逝兮徒貽尔
弓風瀟兮雲且曠曷以招公兮上帝之旁汾水之東有酒既

酌兮有淚斯零為慕高風兮吾奚惡夫哀之無從嗚呼哀哉尚享
維嘉靖十一年歲次壬辰九月丙午朔越十六日辛酉平陽府
知府葛覃等謹以牲帛醴齊粢盛庶品敢昭告于

光祿大夫太子太保兵部尚書陶老先生之靈曰於維我公之生也
地之河嶽天之列星早擢危科載騰

帝庭光大之德本乎天性清修之節厥操以正履歷憲府寔提大綱
勅撫河南風采愈揚維時逆宦稔惡將窺家閭公牘一敷寰宇震動
聿來萋菲謂桂為蕭貝錦是成町疇逍遙逆宦既誅

天王斯悟因言起公仍貞百度

帝曰欽哉汝督漕糧身任舟楫河水湯湯乃積乃倉公私贍殖復握
兵符江寇以息

帝曰卿庸報德乃崇

天書紫泥極品識功年甫幾耆屢求避位白石素月容與斯遂

聖人受命厥政維新曰咨耆德嘉公舊臣不次徵待星言夙駕嚴督
程期委蛇公舍虎符重屬機務是贊十疏懇謝乃允章含山水之
間義方教子瀟登金榜業精而仕箕裘奕葉骭麟制行克肖克家
維忠維敬於戲公之退居宛爾留侯赤松之徒常與周游公之明
蓋高一世之識也歷事

四朝忠誠一致江湖廟廊罔貳以二公之心蓋跨一世之豪也一
經貽世裕後光前苗裔森々弗外象賢公之教蓋有先天下之化

也胡乃山鬼竭吊大星賈光八表有四正寢云亡於戲德位允臧
于公萃只輿論攸協宜離遐祉茲以

天眷西顧三錫殊典將卜葬公於侯庄之陽覃等小子後生來蒞茲
土山斗私懷柱石敬覩悲風瀟颯精幣式陳愴然致奠忱悃是申
靈其弗爽我格我親尚 享

維 嘉靖十二年歲次癸巳十一月己亥朔十九日丁卯平陽
府知府張潤身謹以牲醴庶羞之儀致祭于

大宮保兵部尚書贈少保恭介公陶老先生之靈曰惟靈受天間氣
為世偉人稟賦剛正操履真純歷官中外越四十年後樂先憂

帝嘉其賢 詔登

王朝擬掌鈞軸道與時遠無所回屈

帝眷弗渝柱石是崇受鉞于南營我兵戎公曰老矣引䟽告歸

帝曰俞哉四海歎欵公居故園怡、翼、忠誠恒存遐迹程式公年
雖邁厥德益純謂猶起公安車蒲輪一疾逾年

當宁震悼嗚呼惟公華英之名字宇宙之勲當竹帛垂于不朽豈片辭
之能論予與冢嗣春闈同列歷官于

朝仰公獨切茲握郡符屬公故鄉南瞻愁雲絳水之陽不見裳衣衷
情縈曲聊奠一觴載伸悃悃尚 享

維 嘉靖十一年歲次壬辰七月丁未朔越十六日壬申本州知
州錢貢等謹以清酌庶羞之儀致祭于

明故太子太保參贊機務南京兵部尚書陶老先生之靈嗚呼繫天
地間人非靈具抱陰負陽道隨形鑄彼衆虫々罔知覺悟欲鳩利
牛廼戕厥賦如是曰生即同朽蠹如是曰死即同朝露嗟我逸翁
秀胎靈乳三代遺才九廟玉樹赤子心完至人同趣靜脗乾坤動
合律度道顯為文甲科獨步道掄為政

累朝耆故道蓄為德温良直素道徵為壽期頤天付四樂俱全更誰
缺數人擬喬松金石同固一疾弗瘳

帝全華厝可全者道難逃者數八十四年古今罕遇掉臂歸天於皇
無駁銜笑入地冥々奚惡史墨傳芳為霖流祚近配范韓遠揆伊
傅身亡猶存氣散猶聚貢輩小子東馳西騫竊粟是邦識公晚暮

服教方殷遽聞尊訃失我耆龜奪我韶護棄我倚仗迷我津路耳
目奚藉心志奚晤精采奚培手足奚措野鶴林蟲淒其泣訴匪貢
一人鄉邦悼慕匪絳一邦海宇怛怖匪今一時萬古介注昔君實
薨遠近鄉炷沒文潞公人淚如雨翁則過之我哀何住潢水溪毛
腹心微布翁神洋洋薄筵左顧尚享

維嘉靖十三年歲次甲午四月乙未朔越十一日乙巳絳州知
州劉遂謹以剛鬣柔毛庶羞之儀致祭于

光祿大夫柱國少保兵部尚書陶恭介公之神曰惟

公自登上第踐歷華資樹勳

四朝垂休億載兩間正氣不沒常存日星同昭夷夏共仰遂膺

上命嗣守是邦未獲承顏後增悵恨清修是企芳醑載陳 公神鑒
臨尚其 歆享

維 嘉靖十四年歲次乙未五月丁卯朔越六日壬申絳州知州
高光烈謹以牲醴庶羞之奠敢昭告于

兵部尚書少保恭介公陶老先生之神於惟 先生生鳩河嶽之靈
出任保釐之重澤沛寰宇芳績簡編亮節完名老不殊壯穹秩義
謚久且益光茲乃光烈之夙欽欲躬領教而弗及者也斗山存仰
杖屨難追敷衽陳辭何勝鬱邑瓊漿一酌敬吊 先生尚

鄉良

不肖男治泣血百拜手



